



## Paneli këshillëdhënës për të drejtat e njeriut

Building D, UNMIK HQ, Prishtinë/Kosovë | E-mail: hrap-unmik@un.org | Tel: +381 (0)38 504-604, ext. 5182

### VENDIM

**Data e miratimit: 23 gusht 2012**

**Lëndët me nr. 144/09, 158/09, 209/09 dhe 210/09**

**Ljiljana MITROVIÇ, Danijela KRSTIÇ dhe Slobodanka KRSTIÇ**

**Kundër**

**UNMIK-ut**

Paneli Këshillëdhënës për të Drejtat e Njeriut, i mbledhur më 23 gusht 2012,  
me anëtarët vijues të pranishëm,:

Z. Marek NOWICKI, Kryetar

Z. Paul LEMMENS

Znj. Christine CHINKIN

Të ndihmuar nga

Z. Andrey ANTONOV, zyrtar ekzekutiv

Pas shqyrtimit të ankesave të sipërpërmendura, të paraqitura në pajtim me nenin 1.2 të Rregullores së UNMIK-ut nr. 2006/12 të datës 23 mars 2006 për themelimin e Panelit Këshillëdhënës për të Drejtat e Njeriut,

Pas diskutimeve vendosi si në vijim:

### I. PROCEDURA PRANË PANELIT

- Ankesat e znj. Ljiljana Mitroviç (lënda nr. 144/09), znj. Slobodanka Krstic (lëndët me nr. 209/09 dhe 210/09) u paraqiten më 7 prill 2009 dhe u regjistruan më 30 prill 2009. Ankesa e znj. Danijela Krstic (lënda nr. 158/09) u paraqit më 13 prill 2009 dhe u regjistrua më 30 prill 2009.
- Më 23 dhjetor 2009 dhe 6 tetor 2010, Paneli kërkoi informacione shtesë nga znj. Slobodanka Krstic lidhur me lëndët nr. 209/09 dhe 210/09. Nuk është pranuar asnjë përgjigje.
- Më 13 janar 2010, Paneli kërkoi informacione shtesë nga znj. Slobodanka Krstic dhe znj. Ljiljana Mitroviç për lëndët me nr. 144/09 dhe 159/09. Nuk është pranuar asnjë përgjigje.

4. Më 9 shtator 2010, Paneli vendosi të bashkojë të gjitha lëndët në pajtim me Rregullën 20 të Rregullores së punës të Panelit.
5. Më 19 prill 2012, ankesat ju komunikuan Përfaqësuesit Special të Sekretarit të Përgjithshëm (PSSP), për komentet e UNMIK-ut mbi pranueshmërinë e ankesave. PSSP-ja e dha përgjigjen e UNMIK-ut më 28 maj 2012.

## **II. FAKTET**

6. Znj. Ljiljana Mitrović është bashkëshortja e z. Slobodan Mitrović. Znj. Danijela Krstiç është bashkëshortja e z. Milovan Krstiç. Znj. Slobodanka Krstiç është nëna e z. Milovan Krstiç dhe z. Miodrag Krstiç.
7. Ankuesit theksojnë se z. Slobodan Mitrović, z. Milovan Krstiç dhe z. Miodrag Krstiç u rrëmbyen më 24 qershor 1999 nga pjesëtarë të Ushtrisë Çlirimtare të Kosovës. Sipas znj. Ljiljana Mitrović dhe znj. Slobodanka Krstiç rrëmbimi ndodhi në rrugën në mes të komunës së Shtimes dhe fshatit Duhël, komuna e Suharekës. Sipas znj. Danijela Krstiç rrëmbimi ndodhi në fshatin Carralevë, komuna e Shtimes.
8. Znj. Ljiljana Mitrović dhe znj. Slobodanka Krstiç theksojnë se rrëmbimet ishin raportuar në Komitetin Ndërkombëtar të Kryqit të Kuq (KNKK), në Kryqin e Kuq të Jugosllavisë, në Ministrinë e Punëve të Brendshme të Serbisë, në KFOR, UNMIK, OSBE, në Tribunalin Ndërkombëtar Penal për ish Jugosllavi dhe në Misionin e Bashkimit Evropian për Sundimin e Ligjit në Kosovë (EULEX). Znj. Danijela Krstiç nuk përmendi raportimin e ngjarjes.
9. Kërkesat për gjurmim të KNKK për z. Slobodan Mitrović, për z. Milovan Krstiç dhe për z. Miodrag Krstiç mbesin të hapura. Përveç kësaj, emri i z. Slobodan Mitroviç figuron në listën e personave të zhdukur, të cilën KNKK ia ka komunikuar Policisë së UNMIK-ut më 12 tetor 2001 dhe në bazën e të dhënave të grumbulluar nga Zyra e UNMIK-ut për persona të zhdukur dhe mjekësi ligjore.
10. Më 9 dhjetor 2008, përgjegjësia e UNMIK-ut lidhur me gjyqësorin në Kosovë përfundoi me marrjen e kontrollit të plotë operacional nga Misioni i Bashkimit Evropian për Sundimin e Ligjit në Kosovë (EULEX) në fushën e sundimit të ligjit, pas deklaratës së bërë nga Kryetari i Këshillit të Sigurimit të Kombeve të Bashkuara më 26 nëntor 2008 (S/PRST/2008/44), duke përshëndetur angazhimin e vazhdueshëm të Bashkimit Evropian në Kosovë. Ndërmjet 9 dhjetorit 2008 dhe 30 marsit 2009, të gjitha dosjet e lëndëve penale të cilat mbaheshin nga Departamenti i Drejtësisë së UNMIK-ut dhe nga Policia e UNMIK-ut iu dorëzuan homologëve të tyre në EULEX.

## **III. ANKESAT**

11. Ankuesit ankohen për siç pohojnë dështimin e UNMIK-ut për të hetuar si duhet rrëmbimin e pjesëtarëve të afërt të familjes. Ankuesi gjithashtu ankohen për frikën, dhimbjen dhe ankthin që ata kanë pasur për shkak të kësaj situate.
12. Paneli mendon se ankuesit mund të konsiderohet se thirren në shkelje të së drejtës së z. Slobodan Mitrović, z. Milovan Krstiç dhe z. Miodrag Krstiç për jetë, të garantuar me nenin 2 të Konventës Evropiane për të Drejtat e Njeriut (KEDNJ), dhe në shkelje të së drejtës së tyre për të mos u trajtuar në mënyrë johumane apo degraduese, të garantuar me nenin 3 të KEDNJ.

#### **IV. LIGJI**

13. Para se të shqyrtohen rastet për bazueshmërinë e tyre, Paneli së pari duhet të vendosë nëse do t'i pranojë rastet, duke marrë parasysh kriteret për pranim të përcaktuara në nenet 1, 2 dhe 3 të Rregullores së UNMIK-ut nr. 2006/12.
14. Ankuesit pohojnë mungesën e një hetimi penal adekuat për rrëmbimin e pjesëtarëve të afërm të familjes, dhe vuajtjet mentale dhe dhimjet që atyre u janë shkaktuar nga situata e rrëmbimit të tyre.
15. Në komentet e tij, PSSP-ja nuk e kundërshton pranueshmërinë e ankesave
16. Paneli mendon se ankesat ngenë çështje serioze faktike dhe juridike, vendosja e të cilave do të duhej të varet nga shqyrtimi i bazueshmërisë. Prandaj, Paneli konkludon se ankesat nuk janë të pabazuara në shikim të parë në kuptim të nenit 3.3 të Rregullores së UNMIK-ut nr. 2006/12.
17. Arsyet jetër për shpalljen e ankesave të papranueshme nuk është konstatuar.

#### **PËR KËTO ARSYE,**

Paneli unanimisht,

#### **SHPALL ANKESAT TË PRANUESHME.**

Andrey ANTONOV  
Zyrtar ekzekutiv

Marek NOWICKI  
Kryetar